

A V A N T - P R O P O S .

suivy d'Aladar, puis de Mamite, & apres de Mancalé, & de Sphère : apres le quel on vit regner Mamele, Sparete, & Ascarade, qui reduisit toute la Syrie sous son Empire. On compte apres cezvingt Roys iusques à Sardanaple trente huitiesme Empereur, qui fut contraint de se brusler luy mesme avec toutes ses richesses; & fut reduit à cette extremité par deux de ses Lieutenans, qui diuiserent apres la Monarchie entr'eux : tellement que Beloch fut Roy de Babylone, & Arbace des Medes, & des Perses. Cette Monarchie auoit duré 1300. ans iusques à la fin de Sardanapale.

Beloch fut donc le 39. ou bien le premier Roy d'Assyrie en la nouuelle Monarchie, & rendit son tributaire Manachem Roy d'Israël. L'Escripture le nomme Phiel & non Beloch. Il eut pour successeur Phul Assur, surnommé Tigals-Pilleser, qui s'empara de quelques villes de Iudée, & mena le peuple captif en Assyrie. Il fut suivy de Salmanazar qui se rendit maistre de Samarie, & eut pour successeur Sennacherib, qui fut tué par ses propres enfans. Ces meurtriers s'en estans fuyz, & toutes fois ayant pris les armes contre Assaradon leur frere, qui s'estoit saisi de la Principauté. Merodach, Lieutenant du pays de Babylone se reuolta, & ayant tout vaincu joignit la Monarchie des Assyriens aux Babyloniens. Quelques Auteurs mettent apres cestuy cy Ben Merodach, & Nabuchodonosor, ou Nabuchaduezar, dont l'Escripture parle aussi tōt apres Merodach, Cestuy cy fit la guerre aux Egyptiens, & leur osta tout le pays qui est depuis l'Euphrate iusques à Peluse, ou Damiete : puis ayant vaincu les Roys des Ammonites & Moabites, subiugua finalement toute l'Egypte. Apres luy regna Euilmerodach puis Labassardach, & apres ceux cy Balshazar: mais quelques uns ostent de ce nombre Assur, & Labassardach, mettant Balshazar incontinent apres Euilmerodach son pere. Ce Balshazar fut dernier Empereur de Babylone, comme tous les Auteurs tiennent.

Darius de Mede qui ruina l'Empire des Assyriens, & prit Babylone, est appelé par les Auteurs Cyaxares fils d'Asiage 8. Roy des Medois, nommé par Daniel Assuere, qui donna sa fille à Cyre de Perse fils de sa sœur. Voicy donc le commencement de la Monarchie des Perses, la seconde en nombre, vū qu'apres la mort de Darius tout vint entre les mains de Cyre, qui iouyt seul des pays d'Assyrie, de Mede, & de Perse; & eut pour successeur son fils Cambyse; apres le quel on vit regner Darius fils d'Hystaspe, à qui succeda Xerxe son fils qui fut tué par les siens mesmes, apres auoir rauagé la Grece avec deux millions d'hommes, & auoir esté chassé avec toute cette puissance. Artaxerxe Longue main tint l'Empire apres luy puis Darius le Bastard: & apres cettuy cy Artaxerxe Mnemon, puis Ochus le dernier des trois fils de Darius. Cette Principauté fut apres gouvernée par le dernier Darius vaincu par Alexandre, qui ruina la Monarchie des Perses qui auoit duré deux cens ans & d'auantage.

Alexandre fut donc auteur de la troisieme Monarchie qui fut incon-